

V E N D I M
Nr.88, datë 13.2.2003

**PËR MIRATIMIN E STATUTIT TË INSTITUTIT TË SIGURIMEVE
TË KUJDESIT SHËNDETËSOR**

Në mbështetje të nenit 100 të Kushtetutës dhe të nenit 18 të ligjit nr.7870, datë 13.10.1994 “Për sigurimet shëndetësore në Republikën e Shqipërisë”, i ndryshuar, me propozimin e Ministrit të Shëndetësisë, Këshilli i Ministrave

V E N D O S I:

1. Miratimin e statutit të Institutit të Sigurimeve të Kujdesit Shëndetësor, i cili i bashkëlidhet këtij vendimi.
 2. Vendimi nr.613, datë 20.12.1994 i Këshillit të Ministrave “Për miratimin e statutit të Institutit të Sigurimeve të Kujdesit Shëndetësor”, shfuqizohet.
- Ky vendim hyn në fuqi menjëherë.

KRYEMINISTRI
Fatos Nano

STATUTI
I INSTITUTIT TË SIGURIMEVE TË KUJDESIT SHËNDETËSOR

KAPITULLI I

Neni 1
Krijimi

Instituti i Sigurimeve të Kujdesit Shëndetësor ushtron veprimtarinë e tij në bazë të ligjit nr.7870, datë 13.10.1994 “Për sigurimet shëndetësore në Republikën e Shqipërisë”, i ndryshuar me ligjin nr.8005, datë 14.10.1995 dhe ligjin nr.8961, datë 24.10.2002.

Neni 2
Emri dhe qendra

Instituti i Sigurimeve të Kujdesit Shëndetësor, që më poshtë do të quhet ISKSH, është person juridik me qendër në Tiranë. ISKSH-ja është institucion shtetëror i pavarur, që vepron me drejtoritë rajonale, degët dhe agjencitë lokale në të gjithë vendin.

Neni 3
Administrimi

ISKSH-ja administron fondin e sigurimeve shëndetësore në mënyrë të pavarur. Të ardhurat dhe shpenzimet kryhen sipas ligjit nr.7870, datë 13.10.1994 “Për sigurimet shëndetësore në Republikën e Shqipërisë”, të ndryshuar me ligjin nr.8005, datë 14.10.1995 dhe ligjin nr.8961, datë 24.10.2002.

Neni 4
Fondi rezervë

ISKSH-ja krijon fondin rezervë nga diferenca e të ardhurave me shpenzimet. Me miratimin e Këshillit Administrativ fondi rezervë mund të përdoret:
për disbalancimin e mundshëm të buxhetit të sigurimeve shëndetësore gjatë vitit;
për investime financiare me qëllim rritjen e të ardhurave;

për përballimin e fatkeqësive natyrore.
Në të gjitha rastet e përdorimit si më sipër, madhësia e fondit rezervë për financimin e skemës për 3 muaj do të mbetet i paprekur.

Neni 5

Burimet e financimit dhe përdorimi i tyre

Fondi i ISKSH-së krijohet:
nga kontributet e të siguruarve;
nga kontributi i Buxhetit të Shtetit;
nga donacionet;
d) nga të ardhura të tjera.
Fondi i ISKSH-së përdoret:
a) për rimbursimin e çmimit të barnave të listës së rimbursueshme;
b) për mbulimin e shpenzimeve të shërbimit parësor;
c) për mbulimin e shpenzimeve të shërbimeve shëndetësore që mbulohen nga skema me ligj të veçantë;
d) për shpenzimet administrative;
e) për investimet.

Neni 6

Viti financiar i ISKSH-së është viti kalendarik 1 janar deri në 31 dhjetor.

Neni 7

ISKSH-ja mban dokumentacionin në përputhje me legjislacionin financiar në fuqi.
ISKSH-ja përgatit raportin dhe llogaritë financiare në fund të çdo viti financiar, si dhe harton programin financiar të vitit ushtrimor. Ato përfshijnë bilancin, llogaritë e të ardhurave e të shpenzimeve dhe evidencat e tjera përkatëse. Raporti vjetor dhe programi i veprimtarisë së ardhshme financiare miratohen nga Këshilli Administrativ i ISKSH-së. Buxheti i ISKSH-së i paraqitet Ministrit të Shëndetësisë.

Neni 8

Kontrolli

Këshilli Administrativ miraton komisionin e kontrollit për revizionimin e veprimtarisë së ISKSH-së çdo vit.

ISKSH-ja ngre strukturat e kontrollit dhe organizon kontrollin në të gjitha subjektet që kanë kontratë me ISKSH-në ose që përfitojnë nga skema.

Neni 9

Organet drejtuese

ISKSH-ja drejtohet:
a) nga Këshilli Administrativ;
b) nga Drejtori i Përgjithshëm.

Neni 10

Përbërja e Këshillit Administrativ

1. Këshilli Administrativ është organi më i lartë ekzekutiv dhe përbëhet nga 11 anëtarë, përkatësisht;

- a) Tre anëtarë të caktuar nga Këshilli i Ministrave, që përfaqësojnë:
 - Ministrinë e Shëndetësisë;

- Ministrinë e Punës dhe Çështjeve Sociale;
- Ministrinë e Financës.
- b) Një anëtar nga Instituti i Sigurimeve Shoqërore.
- c) Një anëtar nga Instituti i Sigurimeve të Kujdesit Shëndetësor.
- d) Dy përfaqësues: një nga sindikata që ka numrin më të madh të anëtarëve dhe një nga organizata më e madhe e bujqëve.

e) Katër përfaqësues të palëve të interesuara: një nga urdhri i mjekëve, një nga një organizatë punëdhënësish, një nga prodhuesi më i madh farmaceutik në Shqipëri dhe një nga shoqata e farmacistëve.

2. Këshilli i Ministrave vendos se cila sindikatë, organizatë bujqish e punëdhënësish është më e madhja dhe cili është prodhuesi më i madh farmaceutik, që emërojnë përfaqësuesit e tyre në Këshillin Administrativ.

3. Sipas vendimit të Këshillit të Ministrave, organizatat e mësipërme emërojnë anëtarët e Këshillit Administrativ.

Afati i shërbimit në Këshill është 4 vjet. Anëtarët mund të riemërohen.

Neni 11

Kryesia e Këshillit

Këshilli Administrativ zgjedh me votim të fshehtë kryetarin dhe 2 nënkryetarët e tij, të cilët drejtojnë veprimtarinë e Këshillit. Kryetari zgjidhet nga tre përfaqësuesit e Këshillit të Ministrave.

Neni 12

Mbledhja e Këshillit

Këshilli Administrativ mbledhet jo më pak se katër herë në vit.

Neni 13

Kompetencat për mbledhjen e Këshillit

Këshilli Administrativ mbledhet nga kryetari, dy nënkryetarët, me kërkesën e shumicës së anëtarëve të Këshillit dhe nga Drejtori i Përgjithshëm i ISKSH-së. Drejtori i Përgjithshëm i ISKSH-së ka të drejtë të mbledhë Këshillin Administrativ, kur gjykohet se kërkojnë vendime të shpejta që nuk janë kompetencë e tij.

Neni 14

Njoftimi

Mbledhja e Këshillit Administrativ njoftohet me shkrim të paktën 10 ditë përpara, duke bërë të ditur edhe rendin e ditës. Kur mbledhja e Këshillit Administrativ thirret nga Drejtori i Përgjithshëm i ISKSH-së, mund të mos zbatohen kriteret e mësipërme.

Neni 15

Vlefshmëria e mbledhjes

Mbledhja është e vlefshme kur janë të pranishëm dy të tretat e anëtarëve. Nëse shumica nuk arrihet, mbledhja shtyhet për ditën tjetër, duke bërë edhe njëherë njoftimin e pjesëmarrësve. Për mbledhjen e përsëritur do të jetë e nevojshme gjysma e anëtarëve.

Neni 16

Dokumentacioni i mbledhjes

Për mbledhjet e Këshillit Administrativ mbahet procesverbal nga sekretarja e Këshillit Administrativ, detyrat e së cilës përcaktohen në rregulloren e brendshme të ISKSH-së.

Vendimet e Këshillit Administrativ nënshkruhen nga kryetari dhe në mungesë të tij nga një

prej dy nënkryetarëve dhe depozitohen në ISKSH.

Neni 17

Vlefshmëria e votës për vendimet

Vendimet e Këshillit Administrativ merren me shumicë absolute votash.

Anëtari i Këshillit Administrativ ka të drejtën e një vote.

Në rastet kur votat barazohen, vota e Kryetarit të Këshillit Administrativ është vendimtare.

Neni 18

Kompetencat e Këshillit Administrativ

Këshilli Administrativ ka këto kompetenca:

- a) propozon emërimin dhe shkarkimin e Drejtorit të Përgjithshëm të ISKSH-së;
- b) miraton çdo vit programin e paraqitur nga Drejtori i Përgjithshëm, raportin, bilancin, buxhetin vjetor dhe perspektivat tre-vjeçare të skemës së sigurimeve shëndetësore dhe ia paraqet Ministrit të Shëndetësisë;
- c) miraton investimet dhe vendos për shtimin dhe pakësimin e mjeteve themelore;
- ç) I paraqet Ministrit të Shëndetësisë ndryshime në statutin e ISKSH-së dhe në aktet ligjore e nënligjore të sigurimeve shëndetësore;
- d) vendos për lidhjen e marrëveshjeve me institucione të ndryshme ndërkombëtare të sigurimeve, miraton projekte mbi konsolidimin e skemës ose zgjerimin e saj, si dhe kontrata që kanë të bëjnë me prioritetet e zhvillimit ose me efektet financiare;
- dh) miraton kontratat tip me dhënësit e shërbimit shëndetësor, me farmacitë dhe depot e barnave;
- e) miraton rregulloret e propozuara nga Drejtori i Përgjithshëm;
- ë) miraton komitetin e kontrollit për veprimtarinë e ISKSH-së;
- f) miraton aktet e ISKSH-së lidhur me administrimin dhe procedurat administrative në bazë të kompetencave që i jep ligji “Për sigurimet shëndetësore në Republikën e Shqipërisë”;
- g) miraton kriteret për lidhjen e kontratave me farmacitë e rrjetit të hapur dhe me depot e barnave;
- gj) miraton rregullat për shpërblimin e mjekëve dhe punonjësve të tjerë të përfshirë në skemë;
- h) miraton përdorimin e fondit rezervë sipas statutit;
- i) miraton rregulloren e sigurimeve shëndetësore vullnetare.

Neni 19

Largimi nga Këshilli

Anëtarët e Këshillit largohen nga detyra:

- a) kur dënohen për vepra penale;
- b) kur japin dorëheqjen;
- c) kur vdesin;
- ç) kur ndryshojnë vendin e punës ose subjektin që përfaqësojnë;
- d) kur organi të cilin përfaqësojnë, argumenton se nuk zbatojnë tagrin e përfaqësuesit.

Neni 20

Shpërblimi i anëtarëve të Këshillit

Anëtarët e Këshillit Administrativ të ISKSH-së marrin shpërblim për pjesëmarrje në mbledhjet e tij.

Masa e shpërblimit për kryetarin është 20 për qind e pagës mujore të Drejtorit të Përgjithshëm dhe për nënkryetarët dhe anëtarët 15 për qind e pagës mujore të Drejtorit të Përgjithshëm.

Neni 21

Kompetencat e Drejtorit të Përgjithshëm

Drejtori i Përgjithshëm emërohet dhe shkarkohet nga Ministri i Shëndetësisë me propozim të Këshillit Administrativ dhe ka këto kompetenca:

- a) drejton veprimtarinë e ISKSH-së;
- b) raporton çdo vit për veprimtarinë e ISKSH-së në Këshillin Administrativ;
- c) miraton rregulloren për funksionimin e Institutit të Sigurimeve të Kujdesit Shëndetësor;
- ç) emëron dhe shkarkon zëvendës drejtorin e përgjithshëm dhe drejtorët e ISKSH-së;
- d) përcakton dhe miraton strukturën e ISKSH-së dhe pagat e punonjësve të ISKSH-së;
- dh) emëron dhe shkarkon punonjësit e Drejtorisë së Përgjithshme, drejtorët e drejtorive rajonale, degëve dhe përgjegjësit e agjencive;
- e) vendos për të gjitha çështjet e administrimit të ISKSH-së dhe raporton para Këshillit Administrativ për veprimtarinë e tij;
- ë) propozon në Këshillin Administrativ buxhetin e ISKSH-së, përdorimin e fondit rezervë, programin financiar dhe paraqet raportin vjetor, parashikimin për tre vjet dhe rregulloret e ISKSH-së lidhur me kontributet dhe problemet financiare;
- f) përfaqëson ISKSH-në në të gjitha marrëdhëniet e tij juridike dhe administrative;
- g) lidh aktmarrëveshje të përbashkëta me ISSH-në për masën e shpërblimit lidhur me mbledhjen e kontributeve nga ana e ISSH-së;
- gj) lëshon urdhra e udhëzime dhe vendos sanksione në përputhje me legjislacionin në fuqi.

Neni 22

Trupi drejtues

Në ISKSH krijohet trupi drejtues i përbërë nga zëvendës drejtori i përgjithshëm dhe drejtorët e drejtorive.

Trupi drejtues është organ këshillimor i Drejtorit të Përgjithshëm.

Neni 23

Kompetencat e ISKSH-së

ISKSH-ja ka të drejtë të nxjerrë udhëzime, urdhëresa dhe akte të tjera administrative, në mbështetje të akteve ligjore dhe kompetencave që janë dhënë.

Neni 24

Marrëveshjet ndërkombëtare

ISKSH-ja ka të drejtë të bashkëpunojë dhe të lidhë marrëveshje ose të kryejë veprimtari të përbashkëta me institucione të huaja në fushën e sigurimeve shëndetësore dhe organizata joqeveritare sipas dispozitave ligjore në fuqi.

Neni 25

Pjesëmarrja në aktivitete ndërkombëtare

Nga veprimtaria e ISKSH-së caktohet një fond në lekë e në valutë që përdoret për pagesat e kuotizacionit të anëtarësisë në organizma ndërkombëtare, shpenzime për udhëtime dhe dieta jashtë shtetit për specialistët e ISKSH-së për aktivitete të ndryshme ndërkombëtare, pritje e përcjellje delegacionesh e specialistësh të huaj, madhësia e të cilëve caktohet nga Këshilli Administrativ.

Neni 26

Trajnime

Fondet për zhvillimin e trajnimeve që organizohen nga ISKSH-ja planifikohen në një zë të veçantë të buxhetit të Institutit.

Neni 27
Logo vula

Këshilli Administrativ miraton logon e ISKSH-së. Vula e tij përcaktohet nga dispozitat ligjore në fuqi.

Neni 28
Të tjera

Për problemet që nuk janë të përcaktuara në këtë statut rregullimi do të bëhet me vendim të Këshillit Administrativ brenda dispozitave ligjore në fuqi dhe kompetencave që i janë dhënë ISKSH-së.